

錢海岳撰

南明史

第二冊

中華書局

南明史

錢海岳
撰



第二册
卷一至卷五
本紀

中華書局

南明史卷一

本紀第一

無錫錢海岳撰

安宗

安宗奉天遵道寬和靜穆修文布武溫恭仁孝簡皇帝諱由崧，小字福八，神宗孫、福恭王常洵長子。生母姚氏，萬曆三十五年秋七月乙巳誕於京邸。四十二年，隨常洵就藩河南。四十六年秋七月甲辰，封德昌王，進福王世子。崇禎十四年春正月，李自成破河南，常洵薨，王縋城走懷慶，屢疏請簡重臣專任河防，以固京東。十六年夏五月，襲封福王，威宗手擇宮中寶玉帶付內使賜之。

十七年春正月庚寅朔，聞警，依潞王常澆衛輝，與太妃鄒相失。三月己丑朔，隨常澆南至淮安，寓湖嘴杜光紹園。橐匱，貸常澆千金以濟。三月，北京破，威宗崩，平西伯吳三桂

以山海關、寧遠畔附於清。是月，總督路振飛治兵淮安。

夏四月戊午朔，南京兵部尚書史可法誓師勤王，次於浦口。壬申，總督路振飛執李自成官淮安。威宗凶問至南京，諸大臣議紹述未定，總督馬士英遽發兵扈王次儀真。甲申，文武諸臣以王告廟。乙酉，魏國公徐弘基等迎於江浦。丙戌，舟泊觀音門。丁亥，百官謁見龍江關，王素衣角帶哭，侍茶款語。羣臣啟請監國，王曰：「人生以忠孝爲本，今大仇未報，孤不能事君；先王殉國，國母播越，孤不能事親，無遽登大寶禮。且聞東宮、二王尚陷寇中，或可致之；又瑞、惠、桂王皆諸父行，惟諸先生擇賢迎立。」言訖，淚哭失聲。

是月，周王恭枏薨。總兵劉永昌卒。李自成自北京西走。知縣蘇芳起兵高密。都司李景隆起兵安丘，死之。武舉王奇謀起兵新泰。總兵孫守法起兵終南山。慶王倬、淮、韓王亶等薨。靖南伯黃得功殺副總兵莊朝樑。

五月戊子朔，王乘馬自三山門環城而東，謁孝陵。從臣請自東門御路入，王遜避，自西門入，至享殿，祭告隕泣。禮畢，次謁東陵。自朝陽門入東華門，徒謁奉先殿，出西華門，駐內守備府。先一日，有兩黃星夾日而趨，是日鍾山五色雲見。始江南聞變，多懷疑懼，至是士民始欣欣有固志。

己丑，羣臣謁行宮勸進，箋三上，不許。羣臣以「天下不可一日無君，臣等不得命不敢

起。」王始允遵景皇帝故事監國。

庚寅，自大明門入內朝，行告天禮，祝文飄入雲霄。升武英殿，行監國禮。諭曰：

我國家二祖開天，昭宣鴻烈，列宗纘緒，累積深仁，歷今三百年來，民自高曾以逮子孫，世享太平，代受亭育。其在大行皇帝，躬行節儉，勵志憂勤，宵旰十有七載，力圖剿寇安民。昊天不弔，寇虐日猖，乃敢震驚宮闕，以致龍馭升遐。英靈訴天，冤氣結地，嗚呼痛哉！賊因而屠戮我百官，殺掠我百姓，滔天之惡，蓋載不容，神人共憤。

孤避亂江、淮，驚聞凶訃，既痛社稷之墟，益激父母之仇，矢不俱生，志圖必報。然度德量力，徘徊未堪，終夜拊膺，悲涕永嘆。乃茲臣庶，敬爾來迎，謂倡義不可無主，神器不可久虛，因序謬推，連章勸進，固辭未得，勉徇輿情，於崇禎十七年五月三日暫受監國之號，朝見臣民於南京。孤夙夜兢兢，惟思汛掃妖氛，廓清大難，上慰在天，下對四海，忠孝之道，庶幾無虧。期道深愆，敢不戮力；德涼任重，如墜谷淵；同仇是助，猶賴爾臣民。其與天下更始，可大赦天下，所有應行事宜共三十款。

於戲！自有乾坤，鮮茲禍亂之慘；凡爲臣子，誰無忠義之心？漢德可思，周命未改，惟爾臣民，尚其勗哉，匡余不逮。布告遐邇，咸使聞知。

是日，降將吳三桂引清攝政王多爾袞入北京。秦王存樞、晉王求桂、嘉定侯周奎、恭順侯

吳惟華，大學士馮銓、李建泰，尚書張忻，侍郎王正志、金之後、沈惟炳、任濟、党仲雅、劉餘祐、葉初春，總督高斗光，巡撫劉漢儒，總兵駱養性、唐珏、謝弘儀、王衍範、賈三省、鄭四維、吳紹禮、寶三畏、韓應琦、白廣恩、左勤、王鵬沖、劉有實等畔降於清。

壬辰，史可法、高弘圖禮部尚書、東閣大學士，王應熊禮部尚書、文淵閣大學士，預機務；馬士英，兵部尚書、副都御史、東閣大學士，仍總督鳳陽；張慎言吏部尚書；周堪廣戶部尚書；顧錫疇禮部尚書；黃配玄兵部右侍郎；畢懋康戶部右侍郎，總督倉場；顏渾文選郎中；王若之、凌世韶戶部郎中。總兵張應元鎮守承天，總兵惠登相鎮守襄陽，員外郎萬元吉宣諭各鎮。大學士吳姓疏請練水陸師，分守要害，以衛京師。魏國公徐弘基疏陳五事。御史祁彪佳疏陳致治大本。涂可登復光州，死之。遊擊曹鳳鳴等敗績唐縣，死之。

癸巳，爲大行皇帝舉哀哭臨。

甲午，姜曰廣、王鐸禮部尚書、東閣大學士，預機務；呂大器吏部左侍郎；練國事，戶部右侍郎；總督倉場。

乙未，劉宗周左都御史。巡撫鄭瑄移駐鎮江。給事中錢增疏陳劉澤清、劉良佐避寇南掠，請嚴處以申國法。華允誠驗封員外郎。巡撫何騰蛟復隨州。寧南伯左良玉復荊州、承天、德安、華容。將軍姜瓖、總兵王鉞自大同畔降於清。定京營兵制，罷錦衣衛、南北兩鎮

撫司。

丙申，大學士馬士英率兵入朝。

丁酉，陳泰來、董養河給事中；梁士濟、楊仁愿、鄭崑貞、潘世奇、吳文瀛、鄭封、阮振中御史；夏允彝考功主事。

戊戌，尚書張慎言疏陳中興要務十事。大學士高弘圖疏陳新政切要八事。總兵趙光遠鎮守四川。分准、揚、鳳、廬爲四鎮，靖南伯黃得功，總兵高傑、劉良佐、劉澤清分轄之。罷鳳陽總督，設九江、京口二鎮。貴州民何兆仰變。羣臣勸進，箋三上，不許。

己亥，大學士史可法自請督師江北。

庚子，張國維兵部尚書，協理京營戎政；張有譽戶部右侍郎，總督倉場，疏劾內官張執中杖斃解戶，收其胥役逮治。尚書張國維疏請建三輔以衛南京。王廷梅應天府尹；徐石麒右都御史。侍郎王家楨卒。御史陳賡招募雲南。御史任天成巡按浙江，總兵鄭鴻逵鎮守九江，總兵黃蜚鎮守鎮江。許譽卿光祿卿，袁愷、莊葵、熊開元、姜埰、楊時化給事中，詹爾選、李長春、成勇、李日輔、張煊御史。

壬寅，王即皇帝位於武英殿。詔曰：

我國家受天鴻祚，奕世滋昌，保大定功，重熙累洽。自高皇帝龍飛莫鼎，而已卜無

疆之曆矣。朕嗣守藩服，播遷江淮，羣臣百姓，共推繼序，跋涉來迎，請正位號。朕暫允監國，攝理萬幾。乃累箋勸進，拒辭弗獲，謹於五月十五日，祇告天地宗廟社稷，即皇帝位於南京。

猥以藐躬，荷茲重器。惟我大行皇帝英明振古，勤儉造邦，殫宵旰以經營，希蕩平之績效。乃潢池盜弄，鐘篋震驚，燕薊掃地以蒙塵，龍馭賓天而上陟。三靈共憤，萬姓同仇。朕惟涼德弗勝，遺弓抱痛，敢辭薪瞻之瘁，誓圖俘馘之功。尚賴親賢，戮力勩勤，助朕敵愾。其以明年爲弘光元年，與民更始，大赦天下。所有應行事宜二十五款，詔到之日，星速頒行；匿隱支飾者，訪明究問。

於戲！弘濟艱難，用宣九伐平邦之政；覃敷闡澤，並沛三驅解網之仁。新紉煥頒，前徽益懋。布告天下，咸使聞知。

是日，韓贊周司禮掌印太監，盧九德司禮秉筆太監，提督京營。降順臣項煜混入朝班，衆逐之。

癸卯，大學士馬士英掌兵部，入閣辦事。侍郎黃道周疏陳進取九策。羅大任國子祭酒；侯峒曾左通政。分應天、蘇崑爲二巡撫。鄭瑄大理卿，左懋第僉都御史，巡撫應、徽。甲辰，忻城伯趙之龍總督京營戎政；路振飛副都御史，巡撫東江援遼，贊理軍務；田

仰兵部右侍郎、副都御史，總督漕運，巡撫淮揚。晉左良玉寧南侯，黃得功靖南侯，封高傑興平伯、劉澤清東平伯、劉良佐廣昌伯。禁北來逃官不得入京。

乙巳，命參將王之綱迎太妃河南郭家寨。通政使劉士禎疏請申封駁參治之令。大學士史可法陛辭，諸生盧渭等疏留。祁彪佳僉都御史，巡撫蘇、嵩、嘗、鎮。督師丁啟睿起兵歸德，加兵部尚書。

丙午，應天府丞郭維經疏請諸臣洗滌肺腸，盡去刻薄偏私，及恩怨報復故習。

丁未，尚書張慎言疏薦舊輔吳姓尚書、鄭三俊、王重文選郎中，姜應甲都給事中。大學士馬士英疏陳開國四大計。誠意伯劉孔炤疏請追論封疆失事諸臣。監軍僉事宋劼疏陳人才多壞於門戶。詔封疆失事各官不許起用。給事中李沾疏薦侍郎錢謙益。太嘗少卿陳良弼疏糾李沾、錢謙益。總督袁繼咸疏陳守邦致治大計。給事中錢增疏陳東南第一隱憂，請濬劉河。

己酉，總督路振飛敗李自成兵淮上，疏請大駕親征，願爲前驅。

庚戌，誠意伯劉孔炤奏尚書張慎言於朝。

辛亥，復疏陳慎言薦吳姓、鄭三俊之罪。大學士史可法疏辨，大學士高弘圖、姜曰廣並乞退。上兩解之。御史王孫蕃疏劾誠意伯劉孔炤。萬元吉太僕少卿，監江北軍，疏陳：

「主術無過寬嚴，道在兼濟；官嘗無過任議，義貴相資。」設勇衛營，司禮太監李國輔監督，司禮秉筆太監韓贊周節制。大學士史可法遣官訪大行皇帝、皇后梓宮，并太子、二王。御史鄭友玄督理兩淮鹽法。

壬子，詔卹北京殉難諸臣。魏國公徐弘基疏薦尚書熊明遇等。論翊戴功，進勳臣、內官祿蔭；國子典籍李模疏諫。懷寧侯孫維城疏許舊輔吳姓、尚書鄭三俊。光祿卿沈廷揚疏請練水師。

癸丑，召對大學士高弘圖、馬士英、姜曰廣。大學士史可法祭告祖陵、皇陵，疏請上戰兢惕厲。

甲寅，大學士馬士英疏陳恢復四因。李沾疏言勳臣憤激有因。

乙卯，猶封吳三桂薊國公。侍郎賀世壽疏請肅紀綱而慎刑賞。吳偉業少詹事。命江淮振卹北歸難民，嚴禁掠奪。安遠侯柳祚昌疏許詹事徐汧等，乞速問。御史朱國昌疏劾河督黃希憲、齊撫丘祖德、晉撫郭景昌棄地罪。給事中李沾疏許侍郎呂大器定冊時懷貳心。上曰：「朕遭不造，痛深君父，何心大寶。直以宗社攸關，勉承重任。效忠定策諸臣，朕已鑒知，餘不必深求。」職方郎中劉若宜疏陳戰守事宜。司務陳壁疏陳救時八策。御史米壽圖疏陳諸臣結黨把持，力逐大臣，諛譁御前，大褻體統。應天巡按賀登選疏陳儀、揚、句、

六、江浦鎮兵焚殺。周之璵祠祭員外郎。

丙辰，御史袁弘勳疏言李沾薦人調停，從來誤國宿套。命議河督黃希憲、齊撫丘祖德、
晉撫郭景昌罪。行人羅其鼎疏陳大勢，請縞素倡義。陳子壯禮部尚書，掌詹事府。給事中
熊汝霖疏陳文武爭角殿廷，無人臣禮。

是月，巡撫李鑑起兵宣府。尚寶卿程正揆起兵復滄州。諸生王立賢復興、濟、東、光、
青、獻。劉扁子敗績長垣，死之。張鳳臺敗績高陽，死之。冉材美等敗績曲陽，死之。尚書
田維嘉起兵饒陽。李本吾起兵南宮。吳甲起兵攻東明，圍清豐，復內黃。王鼎鉉復開州。
劉致和敗績隆平，死之。總兵李守汾敗績鉅鹿，死之。千戶張光再復開州。李聯考起兵河
間，復易州，死之。康文斗起兵饒陽，死之。胡明午起兵寧晉。陳白初起兵束鹿。守備李
景隆等敗績束鹿，死之。韓夏子起兵新河。吳三唐起兵深州。馬魁等起兵元氏西山，死
之。郭世光起兵冀州。吳雙堂復衡水。李筱周謀攻高陽，死之。守備張治邦敗績曲周，死
之。王成宇起兵深澤，死之。參將丁啟宗敗績易州，死之。訓導馬元騷奉知縣朱帥欽起兵
德州。許來春等起兵泰安，死之。遊擊高桂起兵泰安。主事凌嗣起兵復臨清。總兵王國
棟復東昌、高唐。員外郎宋祖法起兵東平。都御史房可壯奉衡王由棷復青州。侍郎謝啟
光起兵章丘。都司李允和奉侍郎潘士良起兵濟寧。總督李化熙起兵長山。侍郎張鳳翔起

兵東昌。諸生周啟魯起兵汶上，死之。推官宋璜起兵萊陽。徐春龍起兵東平。練總張茂才起兵嶧縣，死之。僉事胡士棟起兵冠縣。主事左懋泰起兵登州。姜弘通起兵單縣。推官鍾性樸起兵濟南。御史高允茲起兵萊州。劉顯起兵青州。李顯化起兵高唐。張條父起兵館陶。巡撫曾化龍疏陳東昌等二十七州縣復。巡撫宋權起兵歸德。監紀朱恕起兵河南。胡守龍起兵西安，死之。劉天亮起兵咸寧，死之。永康天主亂平。大學士孔貞運、將軍王承恩卒。總兵張誠自密雲畔降於清。湖南大旱。紫微樞星忽隱忽見，天市臨良位光微弱。

六月丁巳朔，日有食之。禁匿名蜚語。撫治王永祚遵旨下獄。

戊午，上大行皇帝、皇后廟諡。追尊皇祖妣鄭貴妃太皇太后。上皇考福恭王諡，皇妣姚貴妃爲皇帝、皇太后；遙上呈繼母鄒太后尊號；追封黃妃、李妃皇后。

己未，將軍陳洪範疏請北使。給事中羅萬象疏請肅朝儀，和文武，以票擬歸內閣，參駁予言路。進士梁于涘疏陳四事。都給事中章正宸疏陳江左形勢，請駐蹕淮上。阮大鍼嗾副總兵王伯時疏陳太皇太后、恭皇帝受朋奸陷害，今報復當不在闖後。甘撫林汝經等起兵林縣，死之。

庚申，頒河北、山東詔。余颺考功主事；文德翼稽勳主事；文震亨、胡正言中書舍人。

侍郎錢謙益疏頌大學士馬士英功，并薦成籍蔡奕琛等。清以肅王豪格侵北直、山東、河南。尚書郭允厚，都御史曹思誠，侍郎王公弼，總督江禹緒，巡撫李鑑、宋權、王鼐、王永、王點、苗胙、李嵩，定西伯唐通，將軍王承胤，總兵劉芳名、葛汝芝、黑雲龍、張致雍、杜允登、張汝行、高第、王應暉、土國寶、馬科、吳勝兆等，畔降於清。都御史劉宗周疏陳時政四事，詔付史館。

壬戌，總兵杜弘域提督大教場；總兵牟文綬提督神機、巡捕營；總兵楊振宗提督江南、北，鎮守安慶。知縣李盤疏陳金湯借箸十二籌。中書舍人周永年疏陳東南戰守、中興建置事宜。廩生何光顯疏請正國體以正人心。

癸亥，鍾斗、馮可賓太嘗少卿。大學士馬士英疏薦逆案阮大鍼，命冠帶陞見。又力攻侍郎呂大器、大學士姜曰廣諸人護持局面。少卿萬元吉、陳良弼，都給事中章正宸，給事中羅萬象、熊汝霖、陳子龍，淮揚巡按王孫蕃，御史左光先、米壽圖，大理左丞詹兆恒，郎中尹民興、李模，府丞郭維經，懷遠侯常延齡交疏諫。大學士高弘圖、姜曰廣爭之不得，乞罷，不許。撫寧侯朱國弼提督神威營，護孝陵。廣昌伯劉良佐率兵攻臨淮不克。命議殉難從逆諸臣功罪。御史朱國昌疏請督撫便宜剿撫。廣昌伯劉良佐遂移駐壽州。職方主事吳國琦疏陳渡江八策。命法司及巡城御史甦獄，分應釋應豁者爲三等，從公舉行。總兵趙光遠提

督川、陝，鎮漢中。御史周元泰疏劾總督王永吉罪。安遠侯柳祚昌疏請以定策功，爵賞大學士馬士英。命潞王常淂居杭州。將軍陳洪範疏陳一代興亡。

甲子，工部尚書程註罷，何應瑞工部尚書。都給事中李清疏請廢無用之金玉，罷不時之傳奉。

乙丑，將軍陳洪範提督沿海五鎮水師，駐瓜洲、泰興。

丙寅，御史米壽圖巡按四川。起戍籍錢謙益禮部尚書，協理詹事府。尚書張慎言罷。太僕少卿萬元吉疏陳先帝寬嚴之用偶偏，任議之途太簡，請以爲鑒。御史郭貞一疏陳屯田、保甲事宜。都給事中沈胤培疏請選中官，詔列聖先帝之仇未報，不許。侍郎吳履中上疏自理。

丁卯，徐汧禮部右侍郎。尚書錢謙益疏陳四事。大學士馬士英疏辨薦阮大鍼事，并請申大逆之誅。上慰士英，切責科道。

戊辰，總兵吳志葵鎮守吳淞。楚王華璧陳中興議。李承芳司禮秉筆太監。

己巳，侍郎呂大器疏劾大學士馬士英。東平伯劉澤清疏陳保邦八款，請誅侍郎呂大器、僉事雷縉祚，薦戍籍張捷、鄒之麟、張孫振等。葛徵奇光祿卿，蔣拱宸御史。職方主事吳易疏陳中興四議。

庚午，大學士姜曰廣疏陳導內傳、停會推之弊。都給事中李沾疏請假楚、鄖、江、皖諸督撫便宜，以壯藩籬；天子內總六師，以重根本。選貢王兆熊疏陳八事。御史郝錦疏陳各鎮村落打糧，東平伯劉澤清尤狂，掃蕩民舍幾盡。

辛未，鳳陽守陵太監谷國珍自增敕書字於御前。

壬申，命嚴核從逆諸臣。大學士□□疏陳恢復大計，必先從山東始。

癸酉，大理左丞詹北恒進欽定逆案，大學士馬士英亦進三朝要典。侍郎呂大器罷，顧錫疇兼署吏部。給事中陳子龍疏請募練水師。

甲戌，李自成攻濟寧，都司李允和拒卻之。

乙亥，追復懿文太子帝號，追崇建文帝、后，景皇帝、后廟諡。僉事凌駟疏陳扼塞之要。丙子，阮大鍼疏陳聯絡、控扼、進取、接應四策，及防江二合三要十四隙。湖廣巡按黃澍入朝，面糾大學士馬士英權奸誤國。士英罷，尋復令視事。澍再疏劾士英可斬罪十。

丁丑，巡撫左懋第疏請北使。張獻忠破重慶，瑞王常浩薨，巡撫陳士奇等死之。太僕少卿萬元吉疏請申諭大小臣工毋急不可居之功名，毋冒不可違之清議，捐去成心，收集人望。議設緝事衙門，巡撫祁彪佳、御史朱國昌、大學士姜曰廣疏諫。

戊寅，改內官監爲朝殿，命肅朝班。巡漕御史白抱一疏陳時政。諸生王光承疏陳時務。

五策。尚書錢謙益疏請雪逆案冤。

庚辰，徐石麒吏部尚書。御史鄭友玄疏請奪大學士溫體仁官蔭資產，顯斥痛追。徐人龍兵部右侍郎，王心一刑部右侍郎。

辛巳，大學士馬士英疏薦大學士謝陞，侍郎張捷、王俞謙、馬直齋詔北方。

壬午，鎮江軍亂，殺副總兵李大開，詔兵將調集聽本處撫臣節制。王燮僉都御史，巡撫山東。尚書張國維疏請增防三輔。何楷戶部右侍郎，程世昌僉都御史，巡撫應安，蔣德璟戶部尚書，文淵閣大學士，召未至。謝陞禮部尚書，建極殿大學士，黎玉田，兵部尚書，盧世淮工部右侍郎，充大行山陵使。下監生陸濬源於獄。莽塞起兵天津唐官屯。

癸未，清兵入德州，大學士謝陞、尚書黎玉田、侍郎盧世淮畔附於清。

甲申，命設山東、河南、山西各官。總兵丘磊鎮山東，將軍黃斌卿防禦鎮江。總兵陳謙疏陳諸臣宜盡滌積習，忘爾我門戶之私，中外交應，以贊中興。太僕卿沈廷揚疏請練水師衛長江。

乙酉，命魯王以海居處州。提督趙光遠以漢中畔附於李自成。清兵入濟南，德王由櫟、泰安王由柵畔降於清。尚書田維嘉、都御史房可壯以饒陽、青州畔降於清。太僕卿李魯生起兵霑化，畔降於清。康玉環起兵濟陽，死之。趙慎寬攻昌樂，葛東方等死之。張廣

攻萊州，倪思齊等死之。

是月，淮安風霾；太平星隕；四川日月無光，赤如血，仰望北斗不見，有大星出西方，芒燄閃爍不定。

秋七月丙戌朔，命暫停緝事衙門，以五城御史糾察，添設兵部侍郎二員。羅汝元刑部右侍郎；劉呈瑞御史。考功郎中葛含馨疏陳清吏、用人、請賑三事。

丁亥，巡撫何騰蛟疏陳守楚要着，以固長江。陳龍正祠祭員外郎，張采儀制主事。

戊子，舉人葛麟疏陳便宜十二事。巡撫曾化龍棄官南下，逮問。金光辰左僉都御史，徐殿臣御史，李之椿光祿丞。

己丑，都給事中章正宸疏陳國是，命大學士史可法鼓勵四鎮，扼防江、淮。清兵陷臨清，尚書張鳳翔棄東昌。廣西巡撫方震孺等募兵入衛，不許。大學士高弘圖疏陳北使七議。

庚寅，大學士蔣德璟疏陳中興三策。左懋第兵部右侍郎、副都御史，經理河北，聯絡關東軍務，與將軍陳洪範等使清。懋第臨行，疏陳必渡河而戰，而後能扼河而守；必能扼河而守，而後能拱護南京於萬一。給事中陳子龍疏請下詔親征，六師並發。李如璩給事中，黃宗昌御史。寧國知府錢敬忠疏請灑淚誓師，不俟終朝。總兵金聲桓駐防淮、揚。